

Date – 01/12/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Mizoramah HIV/AIDS vangin kum 1990 atanga kumin August thla thleng khan mi 5,277 an thi tawh.
2. Sorkar laipui-in Mizorama awm mek ralplante tana a thlawna sem tur buhfai a rawn pek chu Aizawl district tih lohah chuan sem mek zel a ni.
3. Vawiin khan a vawi 6-na atan vawk thi awm loh ni a thleng leh a, a zawna African Swine Fever leng avanga vawk thi awm loh ni a ni.
4. Director General leh Inspector General of Police khawmpuiah Prime Minister Narendra Modi-a hovin ramchhung himna kaihnawih thil pawimawh chi hrang hrang sawiho a ni.

<><><>

WORLD AIDS DAY

Mizoramah HIV/AIDS vangin kum 1990 atanga kumin August thla thleng khan mi 5,277 an thi tawh.

Mizoram State AIDS Control Society (MSACS) chhinchhiah danin, kum 1990 October atanga kumin August thleng khan Mizoramah HIV vei 31,461 hmuhchhuah an awm tawh a. HIV avanga thi zat hi mi 5,277 ni a chhinchhiah a ni. HIV kai tam ber za zela 91 point 23 te chu kum 15 atanga kum 49 inkar mi an ni a. HIV hrik kaina tam ber chu mipat hmeichhiah atangin a ni a, mipat-hmeichhiah hman atanga kai hi za zela 63 point 93 an ni. Ruihlo a inchiu atanga kai za zela a 30 point 80 leh nu leh pa atanga naute-a kaichhawn za zela 2 point 71 an awm a, a chhan sawi fak tur hirah loh za zela 1.47 an awm bawk. HIV/AIDS damdawi Antiretroviral Therapy (ART) la mek mi 16,661an awm mek bawk a ni.

Hei bakah hian National AIDS Control Organisation (NACO) in India rama HIV AIDS dinhmun a tarlanna, kum 2023-a HIV Estimate leh HIV Sentinal Surveillance a tihchhuahah Mizoram chu India rama HIV hluarna ber a ni chhonzawm a, ram mipui atanga chhutin HIV kai zat hi za zela 2 point 73 a ni a. Hetih lai hian kum 2023-2024 chhungin Mizorama HIV kai thar zat a tlahniam hret a, HIV hluarna ber state erawh a la ni chhonzawm zel a ni. Khawvel ram changkang zawkah kumtin HIV kai thar zawi zawiin an tlem zel a, ram thang lai leh rethei zawkah he natna hi a darh chaka, buaipui a hlawh a ni. India ram hi mipui cheng tam ram bik ram tehnaah South Africa leh Nigeria te hnuaiah 3-na a ni mek a ni.

Vawiin hi ‘World AIDS Day’ a ni a, he ni hi HIV/AIDS chungchang zirhona leh a veite chhawmdawl a, tanpuina hun atan hman thin a ni. Presbyterian Church of India, Mizoram Synod hnuaia tualchhung kohhran hrang hrangah he ni pual a thuchah, mipuite hriat tur pawimawh leh zirtirna

te chhiarchhuah a ni . He ni hman dan tur a ruahman hrang hrang te tarlan a nih bakah Mizoramah HIV/AIDS a zia-awm zel theih na'n leh kai thar an awm belh loh na'na inven dan pawimawhte leh hmalakna tur hrang hrangte kohhran mipui hriatah an tarlang bawk a ni.

Hetih lai hian tukin khan Khawzawl District AIDS Prevention and Control Committee member te chuan SDO (Sadar) Pu Suvigya S. Chandra hovin World Aids Day pualin Khawzawl a Home pahnih Chhanchhuahna Home - Zuchhip hmunhluiah leh Grace Camping Center, Khawzawl JNV School bul a mi te chu tlawh in an mamawl hrang hrang - tel, alu, dal leh nutrela engemawzat bakah pawisa fai an hlan a,hei bakah hian kumin World AIDS Day thupui 'Kawng dik zawh rawh' (take the right path) tih a nih angin tun kar Nilaini khian Khawzawl District Hospital Meeting hall-ah khawvel puma HIV darh zel tur leh he natna vei mekte endawngna leh thinhrikna a bo na'n leh enkawltha tha an dawn theih na'n District Hospital-a doctor, nurse leh thawktu zawng zawngte tan HIV Act 2017 chungchang zirtirna buatsaih tum a ni.

<><><>

EMRS

Social Welfare, Women & Child Development Minister Pi Lalrinpuii chuan Zirna-Education chu kawng tinrenga hmasawna ni mah se “by-heart” chak chak dinchhuahna leh dinchanna, ngaihsanna ah Mizoram education system chu a kal mek nia a hriat thu sawiin, hemi kawng ah hian zirlaite chu an zirlai ah awmze nei leh hriatthiamna nei tura a duh thu a sawi a ni.

Pi Lalrinpuii hian Eklavya Model Residential School (EMRS) in 3rd Mizoram State Level EMRS Meet kharna nimin tlai a neih a hmanpuina-ah he thu hi sawiin, infiammi-te tan hamthatna a tam dan leh infiammi thenkhatte chu mi hlawhtling tak tak sum leh paiah pawh India ram infiammite zinga hlawhtling tak tak, an lo chhuak mek zel a ni a ti a. Footballer lama hlawhtling tak tak te ngaihtuah chuan eizawna tlak tak a ni.Ruihtheih thil laka Mizo zirlaite chu an fihlim theih nan infiamna a pawimawh tih sawiin Mizoram ah HIV a darh chak hle a heng venna atan hian infiamna chu a tangkaiin a pawimawh takzet a ni ati bawk.

EMRS Sports Meet ah hian Mizoram Eklavya Model Residential School 11 te an tel a ni.

<><><>

RICE FOR REFUGEES

Sorkar laipui-in Mizorama awm mek raltlante tana a thlawna sem tur buhfai a rawn pek chu Aizawl district tih lohah chuan sem mek zel a ni.

Food, civil supplies & consumer affairs (FCS&CA) department hotute hnen atanga thudawn danin Myanmar, Manipur leh Bangladesh atanga raltlan awm mek mi 40,000 vel tana buhfai sem tur ruahman metric tonne 1,379 leh quintal 30 hi November ni 18 khan FCS&CA hian Food Corporation of India (FCI) hnen atanga la chhuakin district tin kudamah a thlen fel vek hman a. District thenkhat thuneitute chuan November ni 20 atang khan an district chhunga raltlante hnenah an sem tan hman a ni. Raltlan tamna ber Champhai district-ah Myanmar mi 13,986 leh Manipur mi 404 awmin , an tana buhfai ruahman chu quintal 4,533 a ni a, Ningani kalta atang khan an sem tan ani. Raltlan ngah ber dawttu Lawngtlai district in Myanmar raltlan 5,922, Bangladesh raltlan 2,014 leh Manipur mi 84 an mikhual mek a. Lawngtlai

district tana buhfai sem tur ruahman hi quintal 2,526 a ni a, sem chhuah tan a ni tawh a ni. A dawt leha raltlan ngah ber chu Aizawl district niin a vaiin raltlan 7,803 an awm mek a (Myanmar mi 3,411 leh Manipur mi 4,392 an awm) buhfai quintal 2,458 sem tura ruahman a ni.

Aizawl district-ah hian buhfai sem chhuah a la ni lova. Sem chhuah a la nih loh chhan hi Aizawl district-ah hian a thlawna buhfai dawn mamawh lo raltlan hausa tak takte an awm avangin zir chian mek a nih vang a nih thu district thuneitute chuan an sawi a. he thil hi chinfel a nih hnu-ah chauh sem chhuah a ni dawn a ni, an ti. Siaha district-ah Myanmar raltlan mi 5,953 an awm mek a, Manipur leh Bangladesh mi an awm ve lova, Siaha district hian November ni 20 atang khan buhfai an pek chhuah tawh thu district bawrhsap Pu VL Hruaizela chuan a sawi a, sem chhuah tur an dawn hi quintal 1,875 a ni a. Raltlan tlemna ber Khawzawl district chuan raltlan 147 chauh mikhualin buhfai quintal 46 chauh sem tur a dawng a ni.

Raltlan hi Mizoram chhuahsan leh lo luh belh an awm reng avangin a awm zat dik tak hi a danglam reng a. Tun dinhmun thar bera Mizorama raltlan awmzat chu 42,164 a ni a. Myanmar raltlan 33,032, Manipur raltlan 7,118 leh Bangladesh raltlan mi 2,014 te an ni. Tuna sorkar laipui-in buhfai a thlawna sem tura a rawn ruahman hi cheng vaibelchhe 5 hu a ni a, buhfai leina leh phurhna senso hi Ministry of Home Affairs in a tum vek a ni.

<><><>

ASF UPDATE

Vawiin khan a vawi 6-na atan vawk thi awm loh ni a thleng leh a, a zawna African Swine Fever leng avanga vawk thi awm loh ni a nih bakah vawk damlo talh awm loh ni vawi 6-na a ni bawk.

ASF hrileng avanga nitina vawk thi zat chu a hniam chhoh zel laiin pun leh hluai chang a la awm leh thin a. Vawk thi leh suat a awm loh zeuh zeuh tawh hnu-ah Zirtawpni khan vawk 10 thi-in 7 hi Lungdai khua a thi an ni a, hemi ni hian Lunglei Ramthar vengah vawk damlo 2 talh a ni bawk . Nimin pawh kha vawk thi leh damlo talh a awm lo a ni. He ti hian kumin February ni 9-a Champhai district Leithum khua a ASF vawk pulhri leng avanga vawk thi an chhinchhiah tan atang khan a vaiin vawk thi zat hi 14,801 a tling tawh a. Tun dinhmunah hian khaw 257 chu vawk pulhri lenna a puan mek a ni.

Vawiinah khan ASF natna vei, vawk damlo talh a awm lo bawk a. Heti hian kumin chhunga vawk pulhri a darh zel venna atana vawk damlo talh tawh zawng zawng chu 24,059 a tling tawh niin Vety department chuan an chhinchhiah a ni.

<><><>

SYNOD

Chawlhkar khat awh tur Synod Inkhawmpui vawi 101-na chu naktip (Thawhlehi) atang hian Aizawl Mission Vengthlang Kohhran Biak-Inah tan a ni dawn.

Synod Inkhawmpui tan hma hian Committee hrang hrang an thukhawm chho mek zel bawk a. Thawhlehi khian Nomination Committee an thu ang a. December 4 - 7 chhungin Rorel a ni ang a, zan lamah vantlang Pathian Biak inkhawm buatsaih thin a ni ang. December 8 (Pathianni) chawhmaah Pastor nemnggeh leh Pro. Pastor ruat inkhawm buatsaih a ni ang a, chawhnu chu

Lalpa Zanriah Sakramen inkhawm a ni ang a, Zan Inkhawmah Moderator valedictory sermon ngaihthlak a ni ang. Kumin Synod Inkhawmpui Thlarau lam thupui chu 'Lalpa kawng buatsaih' (Isaia 40:3-5) a ni a, December 7 (Inrinni) zana Rev. C. Saikapa, Khatla-in thlarau lam thupui a sawi ang.

<><><>

DG/IGP CONF.

Ram pum huap Director General leh Inspector General of Police khawmpui tawp ni vawiin khan Prime Minister Narendra Modi-a'n state leh union territory zawng zawng himna tur thil pawimawh chi hrang hrang a sawipui a, artificial intelligence, drone leh thil thar siam chhuah chi hrang hrang-in ramchhung himna a tihderthawn theih dante, a firfiaka chetna do let dan tur chungchange, chipchiar taka sawiho a ni.

Police lal khawmpui hi Bhubaneswar-ah neih a ni a, khawmpui tawp ni hi Prime Minister bakah Union Home Minister, Amit Shah, Union Home Secy Gobind Mohan leh National Security Advisor, Ajit Doval-a te pawhin an hmanpui a ni.

<><><>

RAJASTHAN TO INTRODUCE CONVERSION BILL

Rajasthan sorkar chuan an state assembly thutkhawm lo awm turah tih luihnaa sakhaw danga inlehtir khapna bill put luh a tum a, Rajasthan Prohibition of Unlawful Conversion of Religion Bill 2024 duan chhin hi Chief Minister Bajanlal Sharma hova nizana Cabinet meeting neihah pawm a ni.

State Parliamentary Affairs Minister, Jogaram Patel-a'n a sawi danin, he bill-ah hian sakhaw danga inlet duh chuan a hma ni 60-ah district magistrate hnenah dilna a theh lut ang a, tihluihna emaw tawktarh engemaw avanga inlet duh a nilo tih finfiah anih hnuah inleh phalna pek ni se tih rawtna a tel a ni.

<><><>